

29 MAY 2001

MCA-Nanyang

CHUA JUI MENG DAN SEMBILAN LAGI PERSOAL PENGAMBIL ALIHAN NANYANG

Oleh: Alan Ting

KUALA LUMPUR, 29 Mei (Bernama) -- Cadangan yang menimbulkan kontroversi oleh cabang pelaburan MCA untuk mengambil alih dua akhbar utama berbahasa Cina mencetuskan satu lagi perkembangan hari ini apabila naib presiden parti itu Datuk Chua Jui Meng mempertikai langkah itu manakala sembilan pemimpin lain mahukan urus niaga bernilai RM230 juta itu dikaji semula.

Dalam satu kenyataan bertulis yang dikeluarkan sebaik saja beliau tiba dari menghadiri mesyuarat Pertubuhan Kesihatan Sedunia di Geneva, Chua berkata tidak ada parti termasuk MCA mampu mengalami "jurang yang besar antara persepsinya dan pandangan masyarakat yang diwakilinya."

"Saya mengikuti perkembangan kontroversi ini dari seberang laut dan sentiasa mendapat maklumat balas daripada masyarakat dan pemimpin-pemimpin. Jurangnya kini besar dan semakin luas, dan sebagai seorang pemimpin parti, saya berpendapat ianya kurang menyenangkan," katanya.

Cadangan MCA mengambil alih Nanyang Siang Pau dan China Press mendapat bantahan beberapa persatuan Cina, badan bukan kerajaan dan kakitangan kedua-dua akhbar itu.

Mereka bimbang penjualan dua akhbar itu kepada Huaren Holdings oleh Nanyang Press Holdings Bhd akan menyekat kebebasan akhbar kedua-dua harian itu.

Bantahan berlaku walaupun presiden MCA Datuk Seri Dr Ling Liong Sik memberi jaminan bahawa pengambil alihan itu adalah semata-mata satu urusan perniagaan, dan menjelaskan bahawa parti itu tidak mencampuri pengendalian akhbar The Star yang juga dimiliki oleh Huaren Holdings.

Nanyang Press Holdings mengumumkan semalam bahawa ia menerima tawaran tunai RM230 juta oleh Huaren. Urus niaga itu akan dimeterai Khamis ini.

Chua berkata tidak ada parti politik yang boleh mengetepikan pendapat sebahagian besar masyarakat yang ia wakili.

"Saya sayangkan MCA, saya sayangkan Barisan Nasional dan saya menghargai bahawa masyarakat Cina kuat menyokong kita dalam dua pilihan raya umum yang lepas. Adakah sekarang kita mengetepikan pandangan mereka, adakah kita sanggup kehilangan sokongan mereka?" katanya.

"Apa yang kita buat hari ini selaku pemegang amanah dan pemegang saham Huran, serta selaku anggota jawatankuasa pusat akan dihakimi oleh masyarakat Cina dalam pilihan raya umum akan datang. Jangan lupa bahawa kita kini adalah pemegang amanah kepada parti, masyarakat dan negara," katanya.

Chua berkata Datuk Seri Dr Mahathir Mohamad dan Datuk Seri Abdullah Ahmad Badawi telah menjelaskan bahawa terpulang kepada pemimpin MCA, pemegang amanah dan pemegang saham Huaran untuk membuat keputusan sendiri.

Beliau juga kecewa kerana tidak ada mesyuarat diadakan untuk membincangkan urus niaga itu walaupun beliau merupakan seorang daripada empat pemegang amanah dan pemegang saham Huaren Holdings.

"Malahan, saya diberitahu bahawa persetujuan dicapai bersama Hume Industries, pemilik Nanyang Press, oleh beberapa orang yang mendakwa mewakili Huaren dan mereka telahpun membayar 10 peratus daripada harga belian," katanya.

Chua juga mempertikaikan keputusan yang dicapai pada mesyuarat luar biasa Majlis Presiden pada Isnin lepas bahawa The Star Publications akan mengambil alih Nanyang Press.

"Tetapi sekarang ini bukannya The Star, sebaliknya Huaren yang akan ambil alih Nanyang Press. Adakah ini wajar?."

"Jawatankuasa pusat hanya akan bermesyuarat esok. Adakah ini wajar?"

Beliau berkata satu mesyuarat pemegang amanah dan pemegang saham sepatutnya diadakan dahulu bagi menimbang laporan daya maju pengambil alihan yang dicadangkan itu.

Chua berkata beliau tidak tahu jumlah simpanan tunai Huaren dan sama ada Huaren mampu membayar sepenuhnya harga pembelian itu.

"Perlukah kita membuat pinjaman, apakah beban dan kesannya kepada parti dan anggotanya. Apakah sebenarnya yang kita hendak ambil alih? Semua ini saya tidak tahu," katanya.

Merujuk kepada akhbar "Tong Bao" yang tidak diterbitkan lagi kerana kaum Cina tidak menyokongnya, Chua mempersoalkan apa akan terjadi kepada pelaburan Huaren jika pembaca Cina meminggirkan Nanyang Press.

Sementara itu, sembilan wakil rakyat MCA meminta parti itu menimbang semula keputusan membeli dua akhbar berkenaan.

Anggota Parlimen Serdang Datuk Yap Pian Hon dan Anggota Parlimen Bentong Liow Tiong Lai bersama anggota-anggota Dewan Undangan Negeri terdiri Hoh Khai Mun, Fong Koong Fuee, Chan Choon Fah, Chan Kam, Dr Ho Wai Cheong, Datuk Lee Chee Leong dan Loh Yoon Foo, berkata dalam satu kenyataan bahawa pengambil alihan itu akan menimbulkan ketegangan antara MCA dan masyarakat Cina.

Mereka bimbang isu itu mungkin menyebabkan MCA dan BN menghadapi cabaran getir pada pilihan raya akan datang.

-- BERNAMA

AT AU MAI